

佛說無垢賢女經

西晉三藏法師竺法護譯

聞如是一時佛在羅閱祇耆闍崛山中與諸菩薩大弟子學士學女諸天人民阿須倫鬼神龍無央數共會時佛說經爾時會中有長者梵志名曰須檀有婦名禪樓延與九百七十五億婦人俱又手聽經時禪樓懷妊是女在母胎中形體盡具亦於胎中又手聽經賢者阿那律自以功德徹視之力見此女子於胞胎中又手聽經即自念言想在會者自之所覩未能探察無形之事如我者也則自僥倖光色踰悅佛告阿那律汝見何等心色悅異乃如是也阿那律言我以徹視見胎中女又手聽經是以熙怡用自慶耳佛言善哉善哉如汝所言譬如衆星比日月光寧爲等不

汝於聲聞所見第一無逮汝者如來所觀等見十方飛鳥走獸地中諸蟲皆有懷妊子於胎中亦悉如汝一等聽經時阿那律及諸會者咸有疑意佛放光明徹照無極八方上下無所罣礙令無數刹人物所有譬如照鏡表裏相見阿那律等仰視虛空見飛鳥類停翼徘徊聽佛所說胎中之卵未生未孚於鳥胎中亦復舒翅布翼聽經俯視走獸四足之類輟草止水竦立聽經胞胎所懷亦於胎中屈前兩足一心聽經蟲蛇蚰蝮地生之類靜身不搖精意聽經中有懷妊子未產生者亦於胎中舉頭盤身一心聽經時阿那律承佛威神以八種音問胎中女鳥卵蟲獸胎中之子用何等故又手舒翼屈足盤身一心聽經時女人等諸在胎者答阿那律我用一切生者

之類迷於五處不識正道是故聽經及用一切多姪怒癡生死不絕是故聽經用一切人不孝父母不供事佛及比丘僧是故聽經時阿那律聞其所說長跪白佛憶知世尊功德威神洞徹如此我寧以身陷在地獄受衆苦毒累劫無數不取羅漢所以者何諸在胞胎未見身者尚發大意念救一切我今用身以死畏故爲想識所縛譬如死人無益生者時女乃生從右脇出三千國土爲大震動有無數天止在虛空雨於天華作諸音樂則有自然千葉蓮華大如車輪莖如瑠璃女坐其上時諸天人飛鳥走獸蟲蛇蚯蚓諸懷妊者亦皆出生譬如王者征行之時羣官大小莫不隨從於是天帝即持天衣從上來下以用與女裸形可惡取此衣著忉利天子及諸王女

亦皆持衣與諸衆生時女報言其有未脫欲泥洹吾等不從有所受也卿爲羅漢我志菩薩卿非我類所願不同天帝復言我以女身裸露可惡是以持衣用相與耳女復報言於大乘法無男無女我今當有自然衣來佛語天帝如是不爲莊校女身發菩薩心自致相好所現無限乃爲莊校菩薩身耳時舍利弗深怪此女變動乃爾前白佛言此女從何國來到是間乎誰當送衣佛言是女從東南方裨樓延法習佛所來刹名閻浮檀國去此十萬佛刹女從本國來欲見佛自當有衣從本國來衣便自然在空中來肅肅有聲空中有音則語女言可著此衣當得五通又女本國人盡得五通女得衣著便從華上下至佛所女一舉足天地即爲六反震動一切母人皆

發無上平等度意飛鳥蟲獸莫不轉身即化  
爲人身衣天衣珠瓔服飾女以頭面稽首佛  
足三言南無三耶三佛長跪白佛願爲一切  
諸來會者廣說經法令得所願佛隨其意即  
爲說經是時此女及九百七十五億母人聞  
佛所說踊躍歡喜不復貿身便立佛前化成  
男子各各脫瓔珞珠寶用散佛上佛之威神  
令其所散自然變成珠交露帳中有七寶師  
子之座上有坐佛舉手讚之應時皆得阿惟  
越致鳥獸蟲蛇得爲人者亦復脫身珠瓔寶  
飾第十以用散佛帳中坐佛令其所散十二合成寶帳  
亦復如前等無差特則爲達觀俱得七住佛  
告女菩薩無垢賢女汝於胞胎爲衆生作唱  
導如來等正覺亦於五道爲一切衆生作唱  
導佛說經已一切衆會皆大歡喜稽首而退

佛說無垢賢女經